

Tervetuloa Konkkyrensivirastoon – virasto konkkyrensile ja tarjouskilpailulle!

Mikäs konkkyrensi oon?

Konkkyrensi oon ko monet eri yritykset myyvät saman sorttisia tavaroita. Yritykset kilpailevat siis ostajoista. Net konkkyreeraavat ostajoista sillä lailla ette net laskevat hinnat ja tekevät paremat tavarat.

Sillä konkkyrensi oon hyvä konsymentile.

Ko konkkyrensi toimii niin yritykset häätyvät tulla paremaks ja paremaks ette net saattavat myyä heän tavaroita. Mutta niitä häätyy olla sääntöjä millä lailla konkkyrensi pittää toimia. Sillä siiheen oon laki jonka nimi oon konkkyrensilaki.

Miksis kartellit oon kieleetty?

Konkkyrensilaki sannoo ette se oon kieleetty ette laittaa kartelliä. Yks kartelli oon ko monet yritykset jotka myyvät sammaa tavaraa tekevät ytheistyötä tavarann hinnoista. Net päättävät varkhaisin ette kaikilla yrityksillä pittää olla sama hinta heän tavaralle. Silloin konkkyrensi heittää toimimasta, joka siis oon kieleetty.

Euroopan Unionilaki, EU:lä, oon konkkyrensisääntöjä. Net säänot jällaavat Ruottissaki.

Mikäs oon julkinen tarjouskilpailu?

Konkkyrensivirasto pittää huolehtia ette ruottalaiset virastot seuraavat lakia julkisesta tarjouskilpailusta. Joka kerta ko virasto meinaa ostaa tavarann elikkä palvelun niin virasto pittää tehdä julkisen tarjouskilpailun. Se tarkoittaa ette virasto etukätheen häätyy sanoa mitä se haluaa ostaa. Silloin monella yrityksellä oon maholisuus selostaa heän tavaroista elikkä palveluista ennen ko virasto päättää mistä yrityksestä virasto meinaa ostaa.

Mikäs Konkkyrensivirasto oon?

Konkkyrensivirasto oon valtiolinen virasto. Met piämä huolehtia ette yritykset seuraavat konkkyrensin sääntöjä ja ette virastot seuraavat lakia julkisesta tarjouskilpailusta. Met saama tulla esityksitten kansa uushiin säänthöin jotka saattavat tehdä konkkyrensin vielä paremaks. Met tuema niitä jotka tutkivat konkkyrensistä ja tarjouskilpailuista.

Konkkyrensivirastoa johtaa pääjohtaja

Tällä lailla sie saat meän kansa yhteyttä

Jos sie halvaat tietää lissää niin sie saatat lähättää sähköpostin osotheeseen:
konkurrensverket@kkv.se

Sie saatat lähättää faksin faksinumehroon 08-24 55 43
elikkä soittaa telefooninumehroon 08-700 16 00